

UGOVOR
o nabavci službenog putničkog automobila

zaključen dana 28.11.2017. godine, između:

1. **Općinskog suda u Zenici** , sa sjedištem u Zenici, ul. Trg BiH br.2, 72000 Zenica, koga zastupa predsjednica suda Dijana Ajanović (u daljem tekstu: Naručilac)

i

2. **A.S. Auto- Centar d.o.o. Zenica** , Ul. Crkvice do br.66, ID: 4218167280005 zastupan po direktoru - Aida Orman (u daljem tekstu Dobavljač).

PREDMET UGOVORA

Član 1.

Predmet ovog ugovora je nabavka roba - 1 (jednog) službenog putničkog automobila (u daljem tekstu automobil), kojeg će Dobavljač dostaviti Naručiocu, u skladu s odredbama ovog ugovora u obliku njegovih priloga i to:

- Ponudom Dobavljača br. 26-02/17 od 14.11.2017.godine

Ponuda dobavljača – (Prilog 1), ugovorene strane podrazumijevaju da kompletna ponuda Dobavljača koja je dostavljena po predmetnoj nabavci sa svim dostavljenim dokumentima / aktima / dokazima / nacrtima / specifikacijama i dr. čini sastavni dio ugovora sa tim da se zbog obimnosti iste uz ugovor fizički vežu samo dokumenti iz ponude koji se odnose na osnovne komercijalne i tehničke elemente ugovora.

CIJENA

Član 2.

Cijena koju će Naručilac isplatiti Dobavljaču automobila iz člana 1. ovog ugovora, a prema specifikaciji, okvirnim količinama i cijenama navedenim u ponudi iznosi:

Cijena bez PDV-a: 25.632,47 KM;

Porez na dodanu vrijednost (PDV 17%) 4.357,53 KM

UKUPNA VRIJEDNOST / CIJENA sa PDV-om: 29.990,00 KM

(slovima : dvadesetdevethiljadadevetstotinadevedeset i 00 /100 KM).

USLOVI I NAČIN PLAĆANJA

Član 3.

Plaćanje će se vršiti u valuti KM, po dostavljenom računu i ostaloj pratećoj dokumentaciji, u roku do 30 (trideset) dana od datuma dostavljanja računa i prateće dokumentacije od strane Dobavljača.

Račun Dobavljača za plaćanje:

Naziv Banke: Sberbank BH d.d. Zenica

Transakcijski Broj računa: 1406011120012611

Početak roka plaćanja teče od datuma dostavljanja računa Naručiocu, ispostavljenog ne kasnije od osam (8) dana od datuma isporuke. Pod ispostavom računa smatra se datum izdavanja istog.

ROK ISPORUKE

Član 4.

Rok isporuke automobila i ukupno ugovorene i specificirane količine opreme, kao i pripadajućih usluga iz člana 1. ovog ugovora je 40 dana, računajući od datuma obostranog potpisivanja ovog ugovora. Pod isporukom se podrazumijevaju sve potrebne radnje koje je Dobavljač dužan obaviti, prema ugovoru i prirodi posla, da bi Naručilac mogao primiti automobil iz člana 1. ovog ugovora u skladu sa uslovima iz ponude.

Mjesto izvršenja obaveza Dobavljača (isporuke automobila) je sjedište Naručioca.

Naručilac se obavezuje isplatiti cijenu i preuzeti isporuku ugovorenog automobila onako kako je predviđeno ovim ugovorom.

Obaveza Naručioca u preuzimanju isporuke se sastoji u obavljanju svih radnji koje se razumno od njega očekuju da bi omogućio Dobavljaču izvršiti isporuku i u preuzimanju automobila iz člana 1 ovog ugovora.

Do isporuke / predaje automobila Naručiocu (do dana obostranog potpisivanja zapisnika o kvantitativnom prijemu automobila bez primjedbi) rizik slučajne propasti ili oštećenje automobila snosi Dobavljač, a s isporukom / predajom automobila rizik prelazi na Naručioca.

Rizik ne prelazi na Naručioca ako je isti zbog nekog nedostatka isporučenog / predanog automobila raskinuo ugovor ili tražio zamjenu automobila.

Po isporuci automobila, Dobavljač će dostaviti Naručiocu sljedeći dokumente:

- račun koji sadrži precizan opis automobila sa opremom, količinu, jediničnu cijenu i ukupnu cijenu,
- otpremnicu i
- garanciju.

ODGOVORNOST ZA MATERIJALNE I PRAVNE NEDOSTATKE

Član 5.

Dobavljač odgovara za materijalne nedostatke automobila iz člana 1. ovog ugovora, koje je on imao u času prelaza rizika na Naručioca, bez obzira na to da li mu je to bilo poznato.

Dobavljač odgovara i za one materijalne nedostatke koji se pojave nakon prelaza rizika na Naručioca ako su posljedica uzroka koji je postojao prije toga. Neznatan materijalni nedostatak ne uzima se u obzir. Šta se podrazumijeva pod neznatnim materijalnim nedostatkom zajednički / komisijski utvrđuju Naručilac i Dobavljač. U obavijesti o nedostatku automobila iz člana 1., Naručilac je dužan potanje opisati nedostatak i pozvati Dobavljača da pregleda automobil. Ako obavijest o nedostatku koju je Naručilac blagovremeno poslao Dobavljaču preporučenim pismom, telefaksom ili na neki drugi pouzdan način, zakasni ili uopšte ne stigne prodavatelju smatra se da je Naručilac izvršio svoju obavezu da obavijesti Dobavljača. Nedostatak postoji ako ugovoreni / isporučeni automobil nema svojstva i odlike koje su izričito određene ovim ugovorom. Dobavljač odgovara i za nedostatke koje je Naručilac mogao lako opaziti ako je izjavio da automobil nema nikakve nedostatke ili da ima određena svojstva ili odlike.

Dobavljač odgovara ako na isporučenom automobilu iz člana 1. ovog ugovora postoji neko pravo trećeg, koje isključuje, umanjuje ili ograničava pravo Naručioca a o čijem postojanju Naručilac nije bio obaviješten, niti je pristao da primi automobil opterećen tim pravom. Ukoliko se pokaže da treća osoba polaže neko pravo na ugovoreni automobil, Naručilac je dužan obavijestiti Dobavljača o tome (obavještenje se vrši na način iz prethodnog stava ovog člana – preporučeno pismo ili telefaks ili neki drugi pouzdan način), izuzev kad je to Dobavljaču već poznato, i pozvati ga da u razumnom roku oslobodi automobil od prava ili pretenzije trećeg ili da mu isporuči drugi automobil bez pravnog nedostatka. Ako Dobavljač ne postupi po zahtjevu Naručioca, ugovor se raskida.

GARANTNI ROK

Član 6.

(1) Dobavljač se obavezuje da za isporučeni automobil iz člana 1. ovog ugovora dati Ugovornom organu garanciju u trajanju od 4 godine na motor i 12 godina na karoseriju bez obzira na pređeni broj kilometara, uz redovno održavanje u garantnom roku ovlaštenim servisima. Ova obaveza dobavljača se ne odnosi na kvarove koji nastupaju kao posljedica nestručnog rukovanja koja nije u skladu sa uputstvom o rukovanju motornim vozilom.

(2) Dobavljač se obavezuje da obezbijedi originalne rezervne dijelove, servisiranje i održavanje motornog vozila iz člana 1. ovog ugovora u ovlaštenim servisima u toku trajanja garantnog perioda.

(3) Ponuđač je dužan da dostavi plan redovnog servisiranja – servisa (redovni i vanredni), koji bi obuhvatao vremenski garantni period.

(4) Izuzetno u cilju smanjenja troškova ugovornog organa, Naručilac može pristupiti servisiranju motornog vozila kod drugih ovlaštenih servisera sa teritorija Federacije BiH, kako bi se servisiranje izvršilo efikasno i u skladu sa planom redovnog servisiranja motornog vozila.

(5) Garantni period na koji se Dobavljač obavezuje u pogledu ugovorenog automobila počinje teći od datuma obostranog potpisivanja Zapisnika o kvantitativnom prijemu automobila, bez primjedbi. Na osnovu predatog garantnog lista kojim proizvođač automobila garantuje ispravno funkcionisanje istog, Naručilac ima pravo, ako automobil ne funkcioniše ispravno, zahtijevati kako od Dobavljača tako i od proizvođača da automobil popravi u roku od tri dana ili ako to ne učini, da mu mjesto njega isporuči automobil koji funkcioniše ispravno. U slučaju manjeg popravka, garantni rok se produžava onoliko koliko je Naručilac bio lišen upotrebe automobila. Međutim, kada je zbog neispravnog funkcionisanja izvršena zamjena automobila ili njegov bitni popravak, garantni rok počinje teći ponovo od zamjene, odnosno vraćanja popravljenog automobila. Ako je zamijenjen ili bitno popravljen samo neki dio automobila, garantni rok počinje teći ponovo samo za taj dio.

(6) Rok za otklanjanje eventualnih nedostataka i grešaka za vrijeme trajanja garancije iznosi najduže 7 (sedam) dana od dana zaprimljene reklamacije. Svi nedostaci će biti otklonjeni od strane Dobavljača, bez ikakvih troškova po Naručioca, u toku garantnog perioda.

(7) Ugovorni organ ima pravo zahtijevati novi proizvod, ukoliko Dobavljač u predviđenom roku ne otkloni sve nedostatke.

UGOVORNA KAZNA, ZATEZNA KAMATA

Član 7.

U slučaju kašnjenja u isporuci automobila, Naručilac će zaračunati i naplatiti Dobavljaču na ime ugovorne kazne iznos od 1% ukupne vrijednosti automobila, čija isporuka kasni za svaki puni dan zakašnjenja počev od prvog dana docnje do maksimalnih 10 %, ukupne vrijednosti / cijene ugovora.

Naručilac ne može zahtijevati ugovornu kaznu ako je primio ispunjenje obaveze, a nije bez odlaganja pismeno saopštio Dobavljaču da zadržava svoje pravo na ugovornu kaznu. Na zakašnjela plaćanja Dobavljač će zaračunavati Naručiocu zatezne kamate prema pozitivnom propisu.

VIŠA SILA

Član 8.

Ako slučaj više sile potpuno ili djelimično spriječi izvršenje obaveza po ovom ugovoru, ugovorna strana zahvaćena slučajem više sile je obavezna da o nastanku slučaja više sile, o vrsti i o eventualnom trajanju više sile pismeno obavijesti drugu ugovornu stranu u roku od tri dana od nastanka više sile. Ako se blagovremeno ne javi nastupanja slučaja više sile, ugovorna strana koja je pogođena tom okolnošću ne može da se poziva na nju, izuzev ako sama ta okolnost ne sprečava slanje takvog obavještenja.

Pod višom silom, u smislu prethodnog stava, smatraju se spoljni i vanredni događaji koji nisu postojali u vrijeme potpisivanja ovog ugovora, koji su nastali mimo volje ugovornih strana, čije nastupanje i dejstvo ugovorene strane nisu mogle spriječiti mjerama i sredstvima koja se mogu u konkretnoj situaciji opravdano tražiti i očekivati od strane koja je pogođena višom silom.

Kao slučajevi više sile smatraju se sljedeći događaji: rat i ratna dejstva, pobuna, mobilizacija, štrajk u preduzećima ugovornih strana, epidemija, požar, eksplozije, saobraćajne i prirodne katastrofe, akti organa vlasti od uticaja na izvršenje obaveza i svi drugi događaji koje nadležni organ priznaje i proglasi kao slučajeve više sile.

Za vrijeme trajanja više sile obaveze ugovornih strana po ovom ugovoru miruju, ne primjenjuju se odredbe Ugovora o ugovornoj kazni, sa tim da se rok za izvršenje obaveza ugovornih strana produžava za period koji odgovara trajanju slučaja više sile i razumni rok za otklanjanje posljedica više sile.

Ukoliko slučaj više sile bude trajao duže od 30 dana, ugovorne strane će se sporazumjeti o daljnjoj sudbini ugovora. Ukoliko se ugovorne strane ne sporazumiju o sudbini ugovora, ugovorna strana kod koje nije nastupila viša sila ima pravo na raskid ugovora pošto o tome pismeno obavijesti drugu ugovornu stranu.

STUPANJE UGOVORA NA SNAGU

Član 9.

Naručilac sa Dobavljačem zaključuje ugovor za nabavku automobila na osnovu izvornih uvjeta iz tenderske dokumentacije Naručioca i ponude Dobavljača.

Ovaj ugovor stupa na snagu danom obostranog potpisivanja od strane ovlaštenih lica ugovornih strana. Svi rokovi u vezi s ovim ugovorom računaju se od dana stupanja ugovora na snagu, ukoliko posebnom odredbom nije ugovoren neki drugi datum kao početak toka roka.

PRIMJENA ZAKONA O OBLIGACIONIM ODNOSIMA

Član 10.

Ugovorne strane su saglasne sa primjenom odredbi Zakona o obligacionim odnosima i to u pogledu prava, obaveza i odnosa koji nisu regulisani odredbama ovog ugovora, a koji nastanu u vezi i povodom izvršenja ovog ugovora.

RJEŠAVANJE SPOROVA

Član 11.

Sve eventualne sporove i nesporazume koji bi mogli nastati iz ovog ugovora ili povodom ovog ugovora, ugovorne strane će nastojati riješiti usaglašavanjem, posredovanjem ili na drugi miran način u duhu uzajamnog povjerenja i dobrih poslovnih običaja.

Ukoliko ugovorne strane ne postignu mirno rješenje eventualnog spora u smislu stava 1. ovog člana, ugovara se nadležnost suda u Sarajevu, Bosna i Hercegovina, uz primjenu pozitivnog prava Bosne i Hercegovine.

OSTALE ODREDBE

Član 12.

Dobavljač nema pravo zapošljavati, u svrhu izvršenja ovog ugovora, fizička ili pravna lica koja su učestvovala u pripremi tenderske dokumentacije ili su bila u svojstvu člana ili stručnog lica koje je angažirala Komisija za nabavke, najmanje šest mjeseci po zaključenju ugovora, odnosno od početka realizacije ugovora.

Član 13.



Izmjene i dopune ovog ugovora mogu se vršiti samo pismenim putem. Bit će punovažne i obavezivati će ugovorne strane samo one izmjene i dopune koje su sačinili sporazumno u pismenoj formi.

Član 14.

Ovaj ugovor je sačinjen u 4 istovjetnih primjeraka od kojih svaka ugovorna strana zadržava po 2 primjerka.

Član 15.

Ugovor stupa na snagu danom potpisivanja od strane Dobavljača i Naručioca.

DOBAVLJAČ	UGOVORNI ORGAN
Za dobavljača:	Općinski sud u Zenici
DIREKTOR : Aida Orman 	Predsjednica suda : Dijana Ajanović 
Broj: 487-XI / 17	Broj: 143 - 0 - Su-16- 1904
Datum: 28.11.2017.	Datum: 28.11.2017.godine

